



REPUBLIKA E SHQIPËRISË
KOMISIONI I PROKURIMIT PUBLIK

Nr. 136/6 prot.

Datë 04.02.2026

V E N D I M

Nr. 202/2026

Komisioni i Prokurimit Publik, i përbërë nga:

Fiorent Zguro	Nënkryetar
Kreshnik Ternova	Anëtar
Anila Malaj	Anëtar

Në mbledhjen e datës 04.02.2026 shqyrtoi ankesën me:

Objekt:

Shfuqizimi i vendimit të Komisionit të vlerësimit të ofertave mbi skualifikimin e ofertës të paraqitur nga operatori ekonomik “Servis - Auto 2000” SHPK, në procedurën e prokurimit “E hapur, mbi kufirin e lartë monetar”, me REF-69827-11-21-2025, me objekt: “Loti 1: “Mirëmbajtje e mjeteve të transportit për Agjencinë e Mbikqyrjes Policore””, me fond limit 14,118,523.00lekë (pa tvsh), zhvilluar me datë 29.12.2025 nga autoriteti kontraktor, Operatori i Blerjeve të Përqëndruara.

Ankimues:

Operatori ekonomik “Servis - Auto 2000” SHPK, me NIPT K31523078F, dhe adresë Rruga Enriko Telini, Nd. 15, H. 1, Tiranë..

Autoriteti Kontraktor:

Operatori i Blerjeve të Përqëndruara sh.a
Adresa: Rruga “Rreshit Çollaku” Godina Nr. 6/337, Tiranë (në krah të Gjykatës së Lartë).

Baza Ligjore:

Ligji nr. 162/2020 “Për Prokurimin Publik” i ndryshuar, Vendimi i Këshillit të Ministrave nr. 285, datë 19.05.2021 “Për miratimin e rregullave të prokurimit publik”, i ndryshuar, Vendimi i

Komisionit të Prokurimit Publik Nr. 766/2021, datë 13.10.2021 “Për miratimin e rregullave për organizimin dhe funksionimin e Komisionit të Prokurimit Publik”, Neni 4, i Vendimit të Komisionit të Prokurimit Publik nr. 500/2020 datë 5.11.2020 “Rregullore për Marrjen e Masave Organizative për Ushtrimin e Veprimtarisë së Institucionit të Komisionit të Prokurimit Publik gjatë gjendjes së pandemisë së shkaktuar nga COVID -19”.

Komisioni i Prokurimit Publik, pasi dëgjoi relatorin e çështjes, shqyrtoi parashtrimet me shkrim e pretendimet e ankimuesve, dhe pasi diskutoi çështjen në tërësi,

V ë r e n:

I

Vlerësimi paraprak

I.1. Vlera limit e përlogaritur për procedurën e prokurimit objekt-ankimi është mbi kufirin e lartë monetar, ndaj shqyrtimi dhe vendimmarrja do të bëhet nga të gjithë anëtarët, në përputhje me pikën 1, të nenit 30 të ligjit nr. 162/2020 “Për prokurimin publik” i ndryshuar dhe Rregullat e Prokurimit Publik.

I.2. Operatori ekonomik ka *prima facie* interes në këtë procedurë prokurimi dhe për këtë arsye legjitimohet për të paraqitur ankesë në lidhje me të.

I.3. Operatori ekonomik ankimues ka paraqitur ankesë pranë autoritetit kontraktor dhe pranë Komisionit të Prokurimit Publik, në përputhje me kërkesat e përcaktuara në ligjin nr. 162/2020 “Për prokurimin publik” i ndryshuar.

I.4. Ankimesi ka respektuar afatet ligjore të paraqitjes së ankesës pranë autoritetit kontraktor dhe Komisionit të Prokurimit Publik.

II

Rrethanat e çështjes

II.1. Në datën 25.11.2025 në Sistemin e Prokurimeve Elektronike është publikuar procedura e prokurimit “E hapur, mbi kufirin e lartë monetar”, me REF-69827-11-21-2025, me objekt: “Loti 1: “Mirëmbajtje e mjeteve të transportit për Agjencinë e Mbikqyrjes Policore””, me fond limit 14,118,523.00 lekë (pa tvsh), zhvilluar me datë 29.12.2025 nga autoriteti kontraktor, Operatori i Blerjeve të Përqëndruara.

II.2. Në datën 29.12.2025, autoriteti kontraktor zhvilloi procedurën e prokurimit objekt - ankimi.

II.3. Nga verifikimi në sistemin e prokurimit elektronik (SPE), si dhe referuar informacionit të autoritetit kontraktor të dorëzuar pranë Komisionit të Prokurimit Publik, autoriteti kontraktor në datën 08.01.2026, ka kryer vlerësimin e ofertave të operatorëve ekonomikë pjesëmarrës në këtë procedurë prokurimi, të cilët kanë paraqitur ofertat ekonomike (pa TVSH), përkatësisht:

Auto Manoku Servis	10,165,920 lekë	292.71 pikë	Kualifikuar
AEE Service	10,470,000 lekë	292.80 pikë	Kualifikuar
Servis - Auto 2000	10,196,500 lekë	0 pikë	Skualifikuar
Alstezo	12,800,000 lekë	229,40 pikë	Kualifikuar
Vilnik Motors	13,704,300 lekë	218,40 pikë	Kualifikuar

II.3.1. Operatori ekonomik “Servis - Auto 2000” SHPK rezulton i skualifikuar për arsye si vijon: *“Referuar dokumentacionit të dorëzuar në SPE konstatohet se OE nuk plotëson pikë 2.1.b Sigurimin e Ofertës, sipas Shtojcës 3; Nga verifikimi i Formularit të sigurimit të ofertës të paraqitur nga operatori ekonomik “Servis Auto 2000” sh.p.k, me Nipt K31523078F konstatohet se sigurimi i nuk plotëson periudhën e vlefshërise se ofertes prej 150 dite, pasi sigurimi ofertes se dorëzuar është leshuar në datë 26.12.2025 dhe është i vlefshëm për 150 ditë. Referuar DT sigurimi i ofertes duhet të jetë i vlefshëm për 150 dite e perlllogaritur duke filluar nga data e hapjes së ofertave pra duhet të fillonte me datë 29.12.2025 dhe të deklarohej i vlefshëm për 150 ditë nga kjo datë. Sa më sipër operatori ekonomik ka paraqitur periudhë më të shkurtër vlefshmërie se periudha e kërkuar në DST”*.

II.4. Në datën 14.01.2026, autoriteti kontraktor ka publikuar Njoftim - Fituesi paraparak në sistemin e prokurimeve elektronike, për procedurën e prokurimit objekt - ankimi.

II.5. Në datën 16.01.2026 nëpërmjet Sistemit të Ankesave Elektronike njëherazi pranë Komisionit të Prokurimit Publik dhe autoritetit kontraktor, është administruar ankimi elektronik me nr. A/202/6254 dhe nr.136/2026 prot, datë 16.01.2026 i operatorit ekonomik “Servis - Auto 2000” SHPK, në procedurën e prokurimit “E hapur, mbi kufirin e lartë monetar”, me REF-69827-11-21-2025, me objekt: “Loti 1: “Mirëmbajtje e mjeteve të transportit për Agjencinë e Mbikqyrjes Policore””, me fond limit 14,118,523.00 lekë (pa tvsh), zhvilluar me datë 29.12.2025 nga autoriteti kontraktor, Operatori i Blerjeve të Përqëndruara.

II.6. Në përputhje me nenin 112 “Veprimet paraprake” të Ligjit nr.162/2020 “Për Prokurimin Publik” i ndryshuar, Komisioni i Prokurimit Publik me marrjen e ankesës, e publikoi atë në bazën e të dhënave të tij, e cila përmban të dhëna për: a) ankimuesin, adresën dhe NUIS-in; b) të dhëna të plota për procedurën e prokurimit (objekt, numër reference, fond limit, datën e zhvillimit të procedurës), si dhe është publikuar formulari i publikimit Nr. 136/1 prot., datë 16.01.2026.

II.7. Nëpërmjet sistemit të ankesave elektronike, në datën 26.01.2026, autoriteti kontraktor, ka përcjellë pranë Komisionit të Prokurimit Publik vendimin nr. 11/2026, datë 26.01.2026 të Komisionit të Shqyrtimit të Ankesave në lidhje me ankesën e operatorit ekonomik, “Servis -

Auto 2000” SHPK..Referuar vendimit të KSHA rezulton, se ky i fundit ka trajtuar ankesën e operatorit ekonomik ankimes dhe në përfundim të shqyrtimit ka vendosur refuzimin e saj.

II.8. Autoriteti kontraktor e ka përcjellë edhe përmes shërbimit postar, vendimin e KSHA nr. 11/2026, datë 26.01.2026, lidhur me ankesën e operatorit ekonomik “Servis - Auto 2000” SHPK, protokolluar me tonën me nr.136/3prot., datë 28.01.2026.

III

Komisioni i Prokurimit Publik

pas shqyrtimit të ankesës, dokumentacionit bashkëngjitur saj, si dhe informacionit të autoritetit kontraktor,

Arsyeton

III.1. Lidhur me pretendimet e operatorit ekonomik “Servis - Auto 2000” SHPK mbi skualifikimin e tij nga procedura e prokurimit me arsyen se: “ *Referuar dokumentacionit të dorezuar në SPE konstatohet se OE nuk plotëson pikë 2.1.b Sigurimin e Ofertës, sipas Shtojcës 3; Nga verifikimi i Formularit të sigurimit të ofertës të paraqitur nga operatori ekonomik “Servis Auto 2000” sh.p.k, me Nipt K31523078F konstatohet se sigurimi i nuk plotëson periudhën e vlefshërise së ofertes prej 150 dite, pasi sigurimi ofertes së dorezuar është leshuar në datë 26.12.2025 dhe është i vlefshëm për 150 ditë. Referuar DT sigurimi i ofertes duhet të jetë i vlefshëm për 150 dite e përlogaritur duke filluar nga data e hapjes së ofertave pra duhet të fillonte me datë 29.12.2025 dhe të deklarohej i vlefshëm për 150 ditë nga kjo datë. Sa më sipër operatori ekonomik ka paraqitur periudhë më të shkurtër vlefshmërie së periudha e kërkuar në DST)”, Komisioni i Prokurimit Publik vëren se,*

III.1.1. Në shtojcën 9 “Kriteret e veçanta të kualifikimit” pika 2.1.b të dokumenteve të procedurës së prokurimit objekt-ankimi, përcaktohet kriteri si më poshtë:

2. KRITERET E VEÇANTA TË KUALIFIKIMIT

1. Ofertuesi duhet të paraqesë:

a. Formularin Përmbledhës të Vetëdeklarimit, **sipas Shtojcës 10.**

b. Sigurimin e Ofertës, **sipas Shtojcës 3;**

III.1.2. Në shtojcën 3 “Formulari i Sigurimit të Ofertës” të dokumentave të procedurës së prokurimit objekt-ankimi përcaktohet si më poshtë:

Shtojca 3.

[Shtojcë për t’u paraqitur nga operatori ekonomik)

[Letër me kokë e Bankës / Kompanisë së Sigurimeve]

FORMULARI I SIGURIMIT TË OFERTËS

Për: [Emri dhe adresa e autoritetit/entit kontraktor]

Në emër të: [Emri dhe adresa e ofertuesit të siguruar]

** * **

Procedura e prokurimit [lloji i procedurës]

Përshkrim i shkurtër i kontratës: [objekti]

Publikimi (nëse zbatohet): Buletini i Njoftimeve Publike [Data] [Numri]/Nr. Referencës në faqen e APP-se

** * **

Duke iu referuar procedurës së lartpërmendur,

Ne vërtetojmë se [emri i ofertuesit të siguruar] ka derdhur një depozitë pranë [emri dhe adresa e bankës] / është garantuar pranë [emri dhe adresa e kompanisë së sigurimit] me një vlerë prej [monedha dhe vlera, e shprehur në fjalë dhe shifra] si kusht për sigurimin e ofertës, dorëzuar nga operatori i lartpërmendur ekonomik.

Marrim përsipër të transferojmë në llogarinë e [emri i autoritetit/entit kontraktor] vlerën e siguruar, brenda 15 (pesëmbëdhjetë) ditëve nga kërkesa juaj e thjeshtë dhe e parë me shkrim, pa kërkuar shpjegime, me kusht që kjo kërkesë të përmendë mospërbushjen e njërit nga kushtet e mëposhtme:

- Ofertuesi e ka tërhequr ose ka ndryshuar ofertën, pas afatit përfundimtar për paraqitjen e ofertave ose para afatit përfundimtar, nëse është përcaktuar kështu në dokumentat e tenderit;*
- Ofertuesi ka refuzuar nënshkrimin e kontratës së prokurimit kur autoriteti/enti kontraktor e kërkon një gjë të tillë;*
- Ofertuesi nuk ka paraqitur sigurimin e kontratës, ku oferta është shpallur fituese ose nuk ka plotësuar ndonjë kusht tjetër përpara nënshkrimit të kontratës së përcaktuar në dokumentat e tenderit.*

Ky Sigurim është i vlefshëm për periudhën e specifikuar në [njoftimin e kontratës].

[Përfaqësuesi i bankës / kompanisë së sigurimit]

III.1.3. Në Seksionin 3: “Informacione juridike, ekonomike, financiare dhe teknike”, pika 3.1 “Sigurimi i ofertës”, 3.1.2, 3.1.3 dhe 3.2 “Periudha e vlefshmërisë së ofertës” të dokumenteve të procedurës së prokurimit objekt-ankimi, autoriteti kontraktor ka përcaktuar mënyrën e paraqitjes, afatin dhe vlerën e sigurimit të ofertës, si më poshtë:

3.1 Sigurimi i ofertës: *(e zbatueshme në rastin e procedurave të prokurimit me një vlerë më të lartë se sa prokurimi me vlerë të vogël).*

Në rastin e kontratave sektoriale, enti kontraktor, në bazë të diskrecionit të tij, mund të kërkojë sigurimin e ofertës edhe për procedurat nën kufirin e lartë monetar.

Operatori Ekonomik paraqet Formularin e Sigurimit të Ofertës, sipas Shtojcës 3.

Shuma e kërkuar e sigurimit të ofertës është 366,593 (treqind e gjashtëdhjetë e gjashtë mijë e pesëqind e nëntëdhjetë e tre) lekë ose 3,793 (tre mijë e shtatëqind e nëntëdhjetë e tre) euro
Në rastet e paraqitjes së ofertave për Lote të veçanta, vlera e sigurimit të ofertës për secilin Lot do të jetë si më poshtë:

Loti 1 me sigurim oferte ne vleren 282,370 (dyqind e tetëdhjetë e dy mijë e treqind e shtatëdhjetë) lekë ose 2,922 (dy mijë e nëntëqind e njëzet e dy) euro

Loti 2 me sigurim oferte ne vleren 84,222 (tetëdhjetë e katër mijë e dyqind e njëzet e dy) lekë ose 871.4 (tetëqind e shtatëdhjetë e një pikë katër) euro

Konvertimi në Euro sipas Kursit të Këmbimit publikuar nga Banka e Shqipërisë datë 20.11.2025

3.1.2 Autoriteti/ Enti kontraktor pranon vlerën e pagesës së sigurimit të ofertës nga ofertuesi, në vlerë monetare në llogarinë e autoritetit/entit kontraktor

Credins Bank

SËIFT:CDISALTRXXX

NR.LLOGARIE: 00002032030

3.1.3 Autoriteti/enti kontraktor pranon pagesën e vlerës së sigurimit të ofertës nga ofertuesi edhe në formën:

i. garancisë bankare x

ose

ii. nga shoqëri sigurimi të licencuara nga autoritetet kompetente x

3.2 Periudha e vlefshmërisë së ofertës: 150 (shprehur në ditë)

III.1.4. Nga verifikimet në sistemin e prokurimeve elektronike rezulton, se operatori ekonomik ankimues për lotin 1, në përmbushje të kriterit sa më sipër ka dorëzuar dokumentacionin si më poshtë:

- Formularin e Sigurimit të Ofertës me numër serial: 2506009719 në emër të operatorit ekonomik “Servis - Auto 2000” SHPK, të lëshuar **më datë 26.12.2025**, nga shoqëria e sigurimeve “Albsig” SHA për Operatorn e Blerjeve të Përqëndruara, për procedurën e prokurimit "E hapur (Mbi kufirin e lartë monetar), me objekt “Loti 1: “Mirëmbajtje e mjeteve të transportit për Agjencinë e Mbikqyrjes Policore”, me fond limit 14,118,523.00 lekë (pa tvsh),, në të cilën vërteton se “Servis - Auto 2000” SHPK K31523078F është garantuar pranë “Albsig” SHA me një vlerë prej 282,370.00 lek si kusht për sigurimin e ofertës dorëzuar nga operatori i lartpërmendur ekonomik. Ky sigurim është i vlefshëm për periudhën e specifikuar në (njoftimin e kontratës ose ftesën për tender) 150 ditë.

III.1.5. Në nenin 77 “Kërkesat për kualifikim” të Ligjit Nr. 162/2020 “Për Prokurimin Publik” i ndryshuar, parashikohet shprehimisht se:

“1. Autoritetet ose entet kontraktore përcaktojnë kërkesat për kualifikim për operatorët ekonomikë bazuar në:

- a) përshtatshmërinë për të kryer veprimtarinë profesionale;
- b) gjendjen ekonomike dhe financiare;
- c) aftësinë teknike dhe profesionale.

Kërkesat kufizohen vetëm në ato që janë të përshtatshme për të garantuar që një kandidat ose ofertues të ketë kapacitetet juridike, financiare dhe aftësitë teknike e profesionale për të zbatuar kontratën që do të jepet. Të gjitha kërkesat duhet të kenë lidhje dhe të jenë proporcionale me objektin e kontratës.

2. Për sa i përket përshtatshmërisë për të kryer një veprimtari profesionale, autoritetet ose entet kontraktore mund të kërkojnë që operatorët ekonomikë të regjistrohen në një nga regjistrat profesionale ose tregtarë.

Në procedurat e prokurimit për shërbime, ku është e nevojshme që operatorët ekonomikë të kenë një autorizim të veçantë ose të jenë anëtarë të një organizate të veçantë për të kryer shërbimin në fjalë në shtetin e tyre të origjinës, autoriteti ose enti kontraktor mund t'u kërkojë atyre të vërtetojnë se e kanë këtë autorizim ose anëtarësim.

3. Në lidhje me situatën ekonomike dhe financiare, autoritetet ose entet kontraktore mund të vendosin kërkesa që garantojnë se operatorët ekonomikë kanë kapacitetin e nevojshëm ekonomik dhe financiar për të zbatuar kontratën.

Për këtë qëllim autoritetet ose entet kontraktore mund të kërkojnë në veçanti që operatorët ekonomikë të kenë një xhiro vjetore minimale të caktuar. Gjithashtu, autoritetet ose entet kontraktore mund të kërkojnë që operatorët ekonomikë të japin informacione në bilancet e tyre vjetore që të tregojnë raportet ndërmjet aktivitetit dhe pasivit.

Xhiron vjetore minimale që kërkohet nga operatorët ekonomikë nuk mund të tejkalojë dyfishin e vlerës së parashikuar të kontratës.

Kur një kontratë ndahet në lote, ky nen zbatohet për çdo lot individual. Megjithatë, autoriteti ose enti kontraktor mund të përcaktojë xhiron vjetore minimale që u kërkohet operatorëve, duke iu referuar grupeve të loteve, në rast se ofertuesi i suksesshëm merr disa lote që duhet të zbatohen në të njëjtën kohë.

Në rastin e kontratave që bazohen në një marrëveshje kuadër, kërkesa për xhiron minimale llogaritet mbi bazën e përmasave maksimale të kontratave specifike që do të zbatohen në të njëjtën kohë ose, kur përmasat nuk dihen, mbi bazën e vlerës së parashikuar të marrëveshjes kuadër.

4. Në lidhje me aftësitë teknike dhe profesionale, autoritetet ose entet kontraktore mund të vendosin kërkesa që garantojnë se operatorët ekonomikë zotërojnë burimet e nevojshme njerëzore e teknike, si dhe përvojën e nevojshme për të zbatuar kontratën sipas një standardi të përshtatshëm cilësie.

Autoritetet ose entet kontraktore, në veçanti, mund të kërkojnë që operatorët ekonomikë të kenë një nivel të mjaftueshëm përvoja që vërtetohet nga referenca të përshtatshme nga kontratat e zbatuara në të shkuarën.

Aftësia profesionale e operatorëve ekonomikë për të ofruar shërbimin, punën, mallin vlerësohet në lidhje me aftësitë organizative, reputacionin dhe besueshmërinë, përvojën e duhur, si dhe personelin e nevojshëm për të zbatuar kontratën, siç është përshkruar nga autoriteti ose enti kontraktor në njoftimin e objektit të kontratës.

5. Autoritetet ose entet kontraktore përcaktojnë në njoftimin e kontratës ose në ftesën për shprehje interesi kriteret e përzgjedhjes, si dhe dokumentet konkrete që duhet të paraqesin operatorët ekonomikë për përmbushjen e këtyre kriterëve.”.

III.1.6. Në nenin 83, pika 1 dhe 2 “Sigurimi i ofertës” të Ligjit 162/2020 “Për Prokurimin Publik” i ndryshuar, parashikohet shprehimisht se:

“1. Autoriteti kontraktor duhet të kërkojë paraqitjen e sigurimit të ofertës nga ofertuesit në të gjitha llojet e procedurave të prokurimit, me përjashtim të procedurave të prokurimit me vlerë të vogël.

Në rastin e kontratave sektoriale, enti kontraktor duhet të kërkojë paraqitjen e sigurimit të ofertës në të gjitha llojet e procedurave të prokurimit mbi kufirin e lartë monetar, ndërkohë që mund të kërkojë paraqitjen e këtij sigurimi edhe në procedurat nën kufirin e lartë monetar, me përjashtim të procedurave të prokurimit me vlerë të vogël.

2. Autoriteti ose enti kontraktor duhet të specifikojë në dokumentet e tenderit:

a) vlerën e kërkuar të sigurimit të ofertës, e cila duhet të jetë 2% e vlerës së përlllogaritur të kontratës;

b) çdo kërkesë për natyrën dhe formën e sigurimit të ofertës.

Në çdo rast, autoriteti ose enti kontraktor pranon mundësinë e pagesës nga ofertuesi, në vlerë monetare në llogarinë e autoritetit ose entit kontraktor. Përveç kësaj forme të paraqitjes së sigurimit të ofertës, autoriteti ose enti kontraktor, sipas vlerësimit të tij, duhet të specifikojë në dokumentet e tenderit mundësinë e paraqitjes së sigurimit të ofertës:

i. në formën e garancisë bankare; ose

ii. nga shoqëri sigurimi të licencuara nga autoritetet kompetente.”

III.1.7. Në nenin 30 pika 3 “Sigurimi i ofertës” të VKM Nr. 285 datë 19.5.2021 “Për miratimin e rregullave të prokurimit publik”, i ndryshuar parashikohet se:

“3. Autoriteti/enti kontraktor duhet të specifikojë në dokumentet e tenderit vlerën e sigurimit të ofertës, e cila është sa 2% e vlerës së fondit limit të kontratës ose lotit.. Në dokumentet e tenderit duhet të parashikohet një periudhë vlefshmërie, bazuar në kohëzgjatjen e mundshme të procedurës. Sigurimi i ofertës duhet të jetë i vlefshëm gjatë gjithë kësaj periudhe.”

III.1.8. Nga shqyrtimi i dokumenteve të tenderit, vërehet se në kriterin kualifikues të pikës 2.1.b të Shtojcës 9 të dokumentave të tenderit për lotin 1, autoriteti kontraktor sipas parashikimeve ligjore të sipërpërmendura, ka përcaktuar që ofertuesit të dorëzojnë në momentin e ofertimit, sigurimin e ofertës sipas Shtojcës 3 të këtyre dokumenteve, si dhe sipas përcaktimeve në pikat 3.1, 3.1.3 dhe 3.2 të Seksioni 3: “*Informacione juridike, ekonomike, financiare dhe teknike*” autoriteti kontraktor ka përcaktuar format alternative të paraqitjes së sigurimit të ofertës, në formën e garancisë bankare ose nga një shoqëri e licencuar nga autoritetet kompetente sikurse parashikohet dhe në nenin 83 të LPP-së. Gjithashtu ka parashikuar edhe vlerën e sigurimit prej 282,370 lekë pa TVSH për këtë lot, si dhe afatin e vlefshmërisë së sigurimit të ofertës për një periudhë prej 150 ditësh.

III.1.9. Kriteret për kualifikim vendosen që t’i shërbejnë autoritetit kontraktor për të krijuar një panoramë të përgjithshme të kapaciteteve dhe mundësisë së operatorit për përmbushje me sukses të kontratës. Në varësi të kontratës dhe volumit të saj autoriteti kontraktor përcakton kërkesat e veçanta për kualifikim, të cilat janë të detyrueshme për t’u përmbushur nga operatorët ekonomikë pjesëmarrës në procedurat e prokurimit. Operatorët ekonomikë janë të detyruar të përgatisin ofertat, në përputhje me kërkesat e përcaktuara në dokumentet e tenderit

dhe ofertat që nuk përgatiten në përputhje me këto dokumente duhet të refuzohen si të papranueshme.

Gjithashtu, një ndër parimet kryesore të zhvillimit të procedurës së prokurimit është ai barazisë në trajtimin e kërkesave dhe të detyrimeve, që u ngarkohen ofertuesve ose kandidatëve, parashikuar nga neni 3 i ligjit nr. Nr. 162/2020 “*Për prokurimin publik*” i ndryshuar. Zbatimi i parimit të transparencës, barazisë dhe mosdiskriminimit, janë garancitë kyçe ndaj ofertuesve që ofron kuadri ligjor në fuqi. Këto parime ndër të tjera nënkuptojnë se operatorët ekonomikë duhet të jenë në një pozicion barazie, si kur përgatisin ofertat e tyre, ashtu dhe kur të vlerësohen ato.

Komisioni Prokurimit Publik konstaton, se referuar “*Formularit të Sigurimit të Ofertës*” me numër serial: 2506009719 i dorëzuar nga operatori ekonomik ankimues “Servis - Auto 2000” SHPK për këtë lot, është lëshuar në njërën prej formave të përcaktuara në kriterin kualifikues të sipërpërmendur dhe konkretisht nga shoqëri të licencuara nga autoritetet kompetente dhe përkatësisht shoqëria e sigurimit “Albsig” SHA, është sipas Shtojcës 3 të dokumenteve të tenderit të publikuara nga ana e autoritetit kontraktor, si dhe ky formular është sipas vlerës së kërkuar nga autoriteti kontraktor për këtë lot, në Seksioni 3: “*Informacione juridike, ekonomike, financiare dhe teknike*” të dokumenteve të tenderit. Lidhur me arsyen e skualifikimit të dhënë nga autoriteti kontraktor për operatorin ekonomik ankimues, Komisioni vëren se, arsyeja e skualifikimit në thelb është e lidhur me periudhën e afatit të vlefshmërisë së sigurimit të ofertës të ankimuesit, duke pretenduar se nuk ka siguruar ofertën e tij për afatin 150 ditor të përcaktuar në dokumentet e tenderit, pasi sipas tij operatori ekonomik “Servis - Auto 2000” SHPK ka paraqitur sigurimin e ofertës me datë 26.12.2025, e cila nuk hyn në fuqi me datën e hapjes së procedurës dhe rrjedhimisht nuk përmbush afatin e vlefshmërisë së ofertës.

Mbi këtë pretendim të autoritetit kontraktor, Komisioni gjykon, se formulari i sigurimit të ofertës i paraqitur nga ankimuesi, me të vërtetë është lëshuar nga shoqëria e sigurimeve më datë 26.12.2025, por në të është përcaktuar se ky sigurim është i vlefshëm për periudhën e specifikuar në njoftimin e kontratës që është 150 ditë dhe kjo nënkupton se sigurimi i ofertës është konceptuar dhe lëshuar në përputhje të plotë me kërkesat e ligjit dhe DST-së, duke e lidhur vlefshmërinë e tij me periudhën e njoftimit të kontratës dhe dokumenteve të tenderit. Çdo ndryshim i periudhës së hapjes së ofertave nga autoriteti kontraktor rrjedhimisht shtrin efektet edhe mbi sigurimin e ofertës, pa cenuar vlefshmërinë e tij. Ndërsa interpretimi i autoritetit kontraktor nuk qëndron, pasi afati i vlefshmërisë së sigurimit të ofertës prej 150 ditësh fillon nga data e fundit për dorëzimin e ofertave dhe jo nga data e lëshimit të formularit të sigurimit të ofertës.

Nisur nga sa më sipër, Komisioni gjykon, se ankimuesi me dokumentacionin e dorëzuar e ka plotësuar kriterin kualifikues të përcaktuar në pikën 2.1.b të Shtojcës 9 të dokumenteve të tenderit për lotin 1, pasi afati i vlefshmërisë së formularit të sigurimit të ofertës është sipas përcaktimeve në Seksionin 3 të dokumenteve të tenderit.

Sa më sipër pretendimi i operatorit ekonomik ankimues “Servis - Auto 2000” SHPK qëndron.

Për sa më sipër, në mbështetje të neneve 30, dhe 118 të ligjit nr. 162/2020 “*Për Prokurimin Publik*”, Vendimit të Këshillit të Ministrave nr. 285, datë 19.05.2021 “*Për miratimin e rregullave të prokurimit publik*”, i ndryshuar, Vendimit të Këshillit të Ministrave nr. 236, datë

20.04.2023, “Për përcaktimin e rregullave dhe tarifës së pagesës për ankimin në një procedurë prokurimi pranë Komisionit të Prokurimit Publik”, Vendimit të Komisionit të Prokurimit Publik Nr. 766/2021, datë 13.10.2021 “Për miratimin e rregullave “Për Organizimin dhe Funksionimin e Komisionit të Prokurimit Publik”, nenit 4, të Vendimit të Komisionit të Prokurimit Publik nr. 500/2020 datë 5.11.2020 “Rregullore për Marrjen e Masave Organizative për Ushtrimin e Veprimtarisë së Institucionit të Komisionit të Prokurimit Publik gjatë gjendjes së pandemisë së shkaktuar nga COVID -19”, Komisioni i Prokurimit Publik, njëzëri,

Vendos:

1. Të pranojë ankesën e operatorit ekonomik “Servis - Auto 2000” SHPK në procedurën e prokurimit “E hapur, mbi kufirin e lartë monetar”, me REF-69827-11-21-2025, me objekt: “Loti 1: “Mirëmbajtje e mjeteve të transportit për Agjencinë e Mbikqyrjes Policore””, me fond limit 14,118,523.00lekë (pa tvsh), zhvilluar me datë 29.12.2025 nga autoriteti kontraktor, Operatori i Blerjeve të Përqëndruara..
 2. Autoriteti kontraktor të anulojë vendimin e KVO-së mbi skualifikimin e operatorit ekonomik “Servis - Auto 2000” SHPK, duke e kualifikuar atë.
 3. Autoriteti kontraktor brenda 5 ditëve të njoftojë Komisionin e Prokurimit Publik mbi zbatimin e vendimit duke dokumentuar veprimet e kryera.
 4. Ngarkohet zyra e financës, të kryejë veprimet përkatëse për kthimin e tarifës financiare të paguar nga operatori ekonomik “Servis - Auto 2000” SHPK.
 5. Kundër këtij vendimi mund të bëhet ankim në Gjykatën Administrative të Apelit.
 6. Kopje e këtij vendimi i dërgohet për njoftim Agjencisë së Prokurimit Publik.
- Ky vendim hyn në fuqi menjëherë.

KOMISIONI I PROKURIMIT PUBLIK

Anëtar
Kreshnik Ternova

Anëtar
Anila Malaj

Nënkryetar
Fiorent Zguro

